

Dodatak

GLOSAR NOVIH AUTORA

REFKA ČAJIĆ, slikar- amater, rođena je 1947. godine u Gračanici. Slikanjem se bavi skoro čitavog života. Tehnika slikanja: ulje na platnu, tempera, akril, akvarel i dr. Bavi se i slikanjem svile, te kreacijama odjevnih predmeta. Učestvovala je na dvadesetak kolektivnih i tri samostalne izložbe slika, od kojih je jednu priredila u Hamburgu (Njemačka). Član je BZK "Preporod", KUD "Adem Alić" i Društva "Osmjeh" Gračanica.

ISMAIL HADŽIAHMETOVIĆ, doktor medicinskih nauka, internista, diabetolog, profesor emeritus Medicinskog fakulteta Univerziteta u Tuzli, rođen je 22. novembra 1926. godine u Bugojnu. Medicinski fakultet zavrčio je 1953. godine u Sarajevu. Radio je kao liječnik u Foči, Gračanici i Tuzli. Specijalizirao je internu medicinu u Tuzli, Beogradu i Sarajevu. Subspecijalistička postdiplomska usavršavanja iz hematologije, endokrinologije i diabetologije obavljao je u više evropskih naučnih centara. Doktorirao je iz područja endokrinologije. Prvi je diabetolog i osnivač diabetološke službe na području sjeveroistočne Bosne, osnivač je i prvi načelnik internističke službe Doma zdravlja u Tuzli, a zatim osnivač i načelnik Dispanzera za hronične bolesti i Regionalnog dis-panzera za dijabetes Opće bolnice, a kasnije Kliničkog centra u Tuzli. U zvanju vanrednog i redovnog profesora Medicinskog fakulteta u Tuzli, predavao je: internu medicinu, kliničku propedeutiku, uvod u medicinu i istoriju medicine. Od 1989. do 1992. godine bio je šef Katedre za internu medicinu Medicinskog fakulteta u Tuzli. Od 1988. do 1991. godine bio je predsjednik Endokrinološke sekcije Društva ljekara Bosne i Hercegovine, član Predsjedništva Udruženja endokrinologa ex Jugoslavije. Osnivač je Udruženja za borbu protiv šećernih bolesti u Tuzli i suosnivač takvih udruženja u 15 općina sjeveroistočne Bosne. Isto tako, inicijator je i suosnivač Savjetovaništa i Dispanze-

ra za dijabetes u petnaest domova zdravlja i medicinskih centara sjeveroistočne Bosne. Organizator je jednoga, a suorganizator više stručnih i naučnih skupova iz oblasti endokrinologije i dijabetologije. Objavio je više od stotinu naučnih i stručnih radova u domaćim i stranim publikacijama. Učesnik je u realizaciji desetak naučnih studija i projekata.



Sudjelovao je u radu niza znanstvenih simpozija, kongresa i skupova iz oblasti endokrinologije, dijabetologije i bolesti metabolizma.

Od 1994. rodine bavi se izučavanjem kulture i historije Bosne i Bošnjaka. Iz oblasti esejistike i historiografije objavio je dvadesetak radova i tri knjige: "Muradbeg Zeimović - legenda i istina", "Narodna uzdanica u kulturnom i društvenom životu Muslimana Bosne i Hercegovine (1923. – 1945. godine) i Almanah u povodu dvadeset godina Medicinskog fakulteta Univerziteta u Tuzli (1976. – 1996.). U rukopisu mu je djelo "Historijski pregled razvoja i rada Univerzitetskog kliničkog centra u Tuzli (1874. – 1999.). Citiran je u više od trideset djela raznih autora. Nosilac je više vrijednih društvenih priznanja. Živi u Tuzli.

HASAN MOSTARLIĆ, mašinski inženjer, rođen 1953. godine u Ribnici (općina Zavidovići), u Gračanici živi od svoje šeste godine. Završio je Mašinski fakultet, smjer energetski u Sarajevu. Prvo zaposlenje dobio je u Termoelektrani Tuzla, najduže je radio u gračaničkom "Feringu", sada je na dužnosti direktora DOO "Terme" Gračanica. Organizator je i učesnik nekoliko okruglih stolova i savjetovanja iz

oblasti termo-energetike i mašinstva. Autor je ili učesnik u izradi više projekata, među kojima je najznačajnija Studija toplifikacije grada Gračanice.

MIRSAD OMERČIĆ, profesor historije, rođen 7. 3. 1977. godine u Gračanici. Završio je Filozofski fakultet u Tuzli (odsjek historija i geografija). Uži predmet interesovanja: kulturno nasljeđe i spomenici kulture na širem području Tuzlanskog kantona. Učestvovao je na više tribina i okruglih stolova iz oblasti kulturne historije. Zaposlen je u Muzeju Istočne Bosne u Tuzli.

SEAD SELIMOVIĆ, magistar historije, rođen 1963. godine u Babinoj Luci (općina Kalesija). Završio je Filozofski fakultet u Tuzli (odsjek historija i geografija), gdje je i magistrirao, 2003. godine. Po završetku školovanja, radio je u osnovnoj školi Tojšići, a zatim u Arhivu Tuzlanskog kantona. Radi kao viši asistent na Odsjeku za historiju Filozofskog fakulteta u Tuzli. Objavio je više prikaza i stručnih radova iz oblasti arhivistike u časopisima "Arhivska praksa" i "Glasnik DAR BiH", koautor je izložbe "Tuzla kroz vjekove" i učesnik više seminara i stručnih savjetovanja.